

四庫全書

集部

欽定四庫全書

鬱洲遺稿卷六

明 梁儲 撰

墓碑墓表

龍虎將軍上護軍左軍都督府都督僉事前掛
印充總兵官致仕張公神道碑

正德戊寅二月甲子公既卒於大同致政之私第其子
副總兵協同鎮守大同都指揮同知輓大同左衛右所

正千戶軌將以

闕

年

闕

月甲子葬公於郡城窰子岡祖

塋之次而託其親友都督朱君周具行狀請紀績於神
道之碑公諱安字定之姓張氏直隸之和州人高祖興
累從太祖高皇帝征伐授大同左衛百戶曾祖考政妣
余氏安人祖考源正千戶妣趙氏宜人考英指揮同知
妣闕氏淑人後以公貴得推恩三代考俱贈驃騎將軍
都督僉事妣俱夫人公於成化某年以神木等處功陞
指揮使再以威寧海子功陞山西行都司都指揮僉事

又以守備大同左衛地方功陞都指揮同知加都指揮
使弘治己酉改守備朔州又守備天城庚戌奉敕充大
同游擊將軍乙卯充副總兵協守寧夏從賀蘭山境破
敵陞都督僉事掛靖邊副將軍印再掛鎮西將軍印俱
充總兵官鎮守延綏屢有白金文綺蟒衣之賜正德戊
辰以寧夏有警掛征西將軍印己巳以大同有警復掛
征西前將軍印俱充總兵官鎮守其地庚午以年踰六
十疏乞休致既得請遂優游林下垂十年而始卒距其

生正統甲子享年七十有五元配盛氏繼李氏潘氏各封夫人子男二即輓輒也女四長適都指揮劉漢次叅將李淳次都指揮李澤次應襲舍人畢漢孫男一本也女一尚在室洪惟我國家聖治宏敷右文宣武至西北二邊選用將帥尤難其人有如公者生長代北天資凝重家傳韜略才兼智勇結髮與敵人戰常衣皂甲乘黑馬執鐵簡出入敵陣往來如飛人以張益德尉遲敬德比之尤能簡練士卒知幾料敵自偏裨至鎮將四五十年

間大小數十餘戰未嘗敗北前後巡撫總制多以可大
用薦之大司馬馬公以為天下鎮將第一我孝皇尤喜
任之我皇上臨御以來方以邊事倚重公而公則引躬
求退矣豈不惜哉然公遺績在邊陲勛名在國史餘慶
在其子若孫今輓身自積功歷陞副將卓有令望足繩前
烈他日兄弟所樹立皆未可量也是豈非忠孝之報也
哉公訃聞上悼念不已賜齋糧五十石麻布五十疋命
工部如例治葬事自聞喪至周年遣官諭祭者五稽之

故事尚當有崇報之典云銘曰

孰奮其武克紹其祖孰有大勲而克退身人亦有言晚節難
保孰克似公始終完好弱年秉志萬夫之雄橫戈躍馬以奏
膚功官以序遷恩由功致萬里長城於焉是寄明明制敕公
洊奉之桓桓征徒公迭總之四十餘年有勞不伐身既閒居
子仍繼發薰子之藏上有雲章肩祚繩繩邦家其光

福建參政馮公神道碑

成化癸卯七月二十六日亞中大夫福建等處承宣布

政使司右參政南海馮公卒于官又六年為弘治己酉
儲始克拜其貴門岡之墓於是其松栢拱矣而平生一
二遠者大者慮將忘失今不圖咎將誰執敢用據實而
書之碑初公之以進士選吏部也冢宰鹽山王公異之
退而曰是貌古而心直石而王者也除驗封主事踰年
署員外郎王公沒公竟守一節不變屢以職守忤其上
官上官至獎同列以抑公公亦不為之動坐是頗淹滯
歲戊戌乃以郎中久次出參藩政人或謂之晚暮公獨

以為報稱不易未始怨得之之遲也公性簡質又甚謹
畏平居室無長物惟積書至數千卷嘗避遠嫌疑非其
人不妄與交談每旦趨朝雖風雨必先期而至驗封掌
勛臣襲爵與文臣封贈誥勅吏員撥歷諸事動必視例
簿而行一不苟以徇人蓋十五年無毫髮公私過歲丙
申嘗以郎中副駙馬都尉王增授冊伊王府頒賚稠疊
獨辭不受道州縣有一二舊識欲致贐贈行公知其意
遽趣駕不顧而去幾於辭暮夜者矣在福藩奉勅書巡

視海道及督沿海倉糧守哨諸武人歲晏輒厚餉上以
行其私以為舊例也公聞笑曰吾亦有不受一例欲用
之以革此弊海道以是肅然興福漳泉之人至今稱之
卒之日蕭然行李所貽厥子孫者惟清白耳公雅知人
士夫嘗有譽某可人者公曰非遠到器也已而果然於
鄉里稱東莞祁公順與吾邑何公淡之為人二公皆以
文學行誼為世推重不負所知公之取人蓋出于識好
之正而或見其奇中以為骨相占之者豈知公者哉公

之先蓋禮部尚書元之後族譜言尚書父式客廣州卒
葬南海之潯岡今里人指所謂丞相墓者是也尚書既
幼隨母北歸至子某倅南雄老而即南海之何村居焉
依祖墓也傳幾葉為公之九世祖畿又自何村遷今沙
九曾祖諱泰初祖諱觀復鄉里稱善人考諱旻勤於課
子以公貴再贈吏部驗封清吏司員外郎妣盧氏室陳
氏俱再贈宜人繼室李氏封宜人公當遣子焚黃先隴
時語子澤等曰吾昔與而族叔遜遊學其俊爽吾不及

也既二叔領一薦而卒而吾獨後凋受上恩賁先人於
吾足矣富與貴汝曹當力學自致不能為汝作馬牛也
其深知止足類如此自公顯後族弟遇歷南康教諭逾
任福建市舶提舉姪浩歷國子博士治歷浮梁訓導其
始皆一經傳授之力也而尚書之宗至是再亢矣公三
子澤克家濟郡庠生洋尚幼女七人儲即其次壻也公
諱遵字宗轍別號蹊山生洪熙乙巳二月癸丑居人間
世五十有九年墓於貴門岡從先兆也銘曰

在可推移尚克自持勿謂公遲處身膏腴不肯自肥吾義如斯當適意時西山支頤如脫繫羈今子樸茂而孫嶷岐若有所為蓋天無私報人匪欺尚致疑者視此銘詩

故金吾左衛百戶贈明威將軍指揮僉事王君

墓表

君諱成字德成姓王氏先世有居山後全寧鄉落馬河之新寨者其始祖也傳五世至覽全翁當國初時從中山武寧王牧馬涿鹿充燕山左護衛勇士後從太宗皇

帝奉天征討累功陞總旗娶李氏生三子君其長也性英敏卓犖自幼屹然如成人稍長承父蔭為總旗居常習武藝講求古今兵法異以功名自表見正統己巳詔選武士禦邊寇公從大兵戰敗彰義門外拔箭復入卒勝之陞金吾左衛試百戶英宗皇帝復登大寶重錄前功遂實授百戶君在官廉慎不苟取予待士卒有恩惠卒有李欽者嘗欲售其奸而不遂構公以不法事賴當道燭其誣坐卒罪徙之邊君尚贖以金而贍其家其仁

厚如此于時上下咸敬服紀綱振舉凡軍需利害之當興革者君隨事有所建白督府及本衛多行其議其處家也事親有甘旨之奉而自奉甚儉約宗族鄉黨故舊凡有求者皆量力濟助之至於教子孫接賓友待僮僕多可以為後人法者武弁有若人是亦可以為難矣元配夏氏繼汪氏子男三長曰雄夏氏出也次曰佐曰佑汪氏出也雄既襲職而卒其子岱孫璽相繼襲亦俱卒佐有文武才初以輸粟濟邊恩授武德衛指揮僉事改

騰驤左衛嘗援例襲雄職其官階則曰明威將軍僉金
吾左衛指揮使司事云孫十一人整密昂峻啓恒崧崑
岑佐出也密密佑出也君生於永樂己丑七月一日卒
於成化辛卯四月十有二日葬順義縣龍山村祖塋之
次今四十有九載矣近以佐之貴始得賜誥贈公如佐
官二母及妻胡氏俱恭人佐受恩感極而泣乃狀君行
請予表諸墓予與佐故人也遂不辭而書之銘曰

人有恒言積鉅發遲君家世德人罕及知迨君奮發效用於

時沒餘四紀聞者興思子今克肖階至明威天恩下逮
贈典斯貤松楸愈茂門戶增輝追原所自致者其誰我
拜君祠載作銘詩庶幾來裔紹述無違

明奉政大夫刑部四川司郎中桂陽朱中孚墓
表

君姓朱氏諱守孚字中孚號竹園太子少保都察院右都
御史誠菴公之子也其家世行實見于鄧御史宗周之
狀詳矣其弟舉人守蒙來京師重求儲表其墓曰先兄

遺意也嗚呼儲敢不撫實為君言之惟誠菴公歷仕中外餘四十年德政被吾廣尤為久且厚億萬維生視公猶父也儲因緣茲義與君處且七八年不敢謂盡知君要之君蓋有志通練而介潔者也少為貴胄公子能知力學以進士第自秋官主事歷郎中階奉政大夫貴顯矣然居常節飲食戒侈靡公退恒讀書求益不止也謂為有志者非耶當浙東陸公閩中林莊公相繼為司寇時不特諸司奉牘委之君而已如恤刑雲貴錄獄南畿

皆朝廷所賴以洗冤澤物者咸請以命君至於推覈徐
杭一二難事亦惟君是任謂為通練者非耶君當官常
擇交游慎取與嘗從雲貴道廣省誠菴公之故人下吏
聞君嚴毅雖蔬果不敢言獻不特無暮夜金而已君沒
後其子瑤所存唯舊田廬自餘無別積固為仁不富之
效也謂為介潔者非耶凡人好惡自古不齊君當時聲
聞四馳然辛鹹甘苦異嗜豈謂無訾君者至跡其所以
為說則固未嘗以簞簋事汙君以不涉歷少君者也豈

非公道自不可泯乎哉歲甲辰公自廣歸掌院政有巡按甚狼藉自肆者羣御史醜之當路有極力維持以屬公者君以清議白公事竟格不行今國史已入公傳而於君雲貴南畿徐杭之命亦繫於年月之下可謂西平有子矣惜公卒逾年成化乙巳八月君亦病於家大事未襄母胡夫人在堂君銜憂以沒事業不大施於世年纔五十有二耳非命乎然守蒙方舉進士有名璫也樸茂亦克稱其家天其以弟若子示為善之報也歟銘曰

朱在桂陽始由徐徙幾世幾年種福于此君家治獄陰
德實多尚徵孫子天道豈謫君固通才復厲清操誰敢
過諛允矣君蹈明明國史傳信萬年如君父子輝映後
先人亦有言五十非夭君死有知亦復誰少君於文字
素辱眷予予之不文曷應君需顧屬續言不敢遺墮謹
撫所知列於墓左維英靈骨葬楚一鄉是山松栢相與
為長

毅菴蕭君墓誌銘

成化辛丑九月二十六日潮陽蕭公卒於家越明年正月二十三日其家人始得以凶問告其嗣泰於京師大夫君子知泰者皆往弔之泰纍然持其親友吳地官主事裕之狀詣儲請銘公墓曰先人將托此以不朽拜且泣儲與泰領鄉薦同年居京師相與之日久視公丈人行也義不可終辭按公先江右人曰國梁宋乾道進士第一守福之漳州子煜仕至左司郎中孫洵知廣之潮陽縣初家潮陽洵生昭元昭元生進士規規生憲僉禦


疾禦疾生唐福唐福生程鄉教諭德俊德俊之季子曰
星星之四子曰正四正四五子公其嗣也母素氏公生
於望族長而通敏有智謀昂然自奮思有立於世恥碌
碌隨人後事父母盡孝正統丙寅父出粟千石賑民飢
有詔以義民旌之公代赴闕庭謝恩往返萬里若之東
西家無難色景泰辛未舉宗為橫逆誣搆世業半入于
官父因沒於官邸公申雪於朝復其業間關奉柩歸葬
內輦壠上聞者稱嘆之其事先于忌諱日若歲伏臘祭

薦酌古今禮以行晚作祠堂一區用嚴祀事未就而卒
公善處諸弟諸弟每稟命而行於臧獲輩嚴泣而慈畜
之于宗戚鄉黨有恩意相接吉凶慶弔禮無不及其弱
不能自存與大婚急喪貧不能卒事者時溫存相助之
至于踰越禮分桀黠為鄉里患苦不可長者則未嘗苟
為遜避直前與之角必使之不獲逞而後已故此輩雖
未免有小言而感德者甚眾是非曲直有不訟于官而
必之公之堂者至或為之具酒食和解之尤善用人有

所營建若誅苑墾土之事佃丁趨其役者或數十百人
指授方略而善飲食慰勞之故人樂効力而事亦隨集
性不喜奢靡然於所當用者即倒困不顧故雖田連阡
陌而家無厚藏亦可以見積而能散者之效也天順己
卯公又出賑濟飢米八百斛詔義之賜七品秩為承事
郎嘗語泰曰吾賴先人餘慶以有今日抑此未足為汝
曹道夫奇男子當以濟時行道為賢顯親揚名為孝爾
其勉之泰自戊戌乙榜不就南歸復敦遣挈孥入太學

博文廣業以成其志泰今歷事春官將取捷于甲辰之
會試道有可期而公不待矣悲夫公諱鈴字景鏘號毅
菴生永樂戊戌十月三十日卒距生之歲享年六十有
四配韋氏側室鄒氏子男三長即泰次昂次夔泰夔韋
氏出夔先逝女二長壻陳賓次莊旭孫男及見者二曰
良輔良弼泰歸將以某月日葬於西岩山前之原銘曰
繫維公昔年時涉艱危憂路岐亦既壯卓有為驅田禽
披草萊人不足吾所裨輸家糧荒年廉帝曰都義如斯

官其身勸羣黎服寵光報何期願子賢國是毗志方長
髮短而樹永安風動之潮山高水連漪佳城完公來歸
誰氏銘太史辭慰重泉無後當



鬱洲遺稿卷六

欽定四庫全書

集部

鬱洲遺稿卷八

詳校官中書_臣瞿 照

中書_臣劉源溥覆勘

總校官原任中允_臣王燕緒

校對官典簿_臣劉景岳

謄錄監生_臣龔輝遠

欽定四庫全書

鬱洲遺稿卷七

明 梁儲 撰

墓誌銘

武定侯郭公夫人許氏合葬墓誌銘

昔在天順辛巳武定侯郭公昌卒朝廷賜葬于西直門外廣源間之原自成化乙酉其元配夫人曳氏卒合葬于左方今正德壬申八月十五日次室夫人許氏卒又

以是年某月甲子合葬于右方是時也夫人之嗣子曰
武定侯諱良者已前卒其嗣孫太保武定侯曰某者又
奉命鎮守兩廣不得以家事辭官事次孫勲衛勲及弟
勲勸勅曾孫房同竭力襄事仍具疏乞恩哀請上命賜
葬祭如例且有齋糧麻布之賜亦盛典也既又奉翟編
修鑒之狀請銘於余按夫人諱某字某姓許氏宣德壬
子正月初五日生于南京之大功坊幼有淑質夙聞內
則父諱旺南京留守衛同知及其母羅氏鍾愛之為擇

所從得公而受聘歸焉時公尚為南京錦衣衛指揮僉
事夫人佐理內政睦于上下公及曳夫人甚宜之至天
順戊寅公始以世嫡應襲祖爵於是族人有所爭襲者結
黨誣搆奏訴公亦抗章自理事下錦衣獄兩夫人親抱
幼子良就獄置對艱苦萬狀後鞫辯已白始置諸誣奏
者于法然自此再踰歲公亦不幸即世矣曳夫人以子
良襲爵優給請而彼爭襲者仍誣奏不已朝廷遂兩罷
之命良為錦衣僉事又三十餘歲為弘治壬戌時公議

益昭朝廷閔開國元勲太宗之後封爵久不嗣始以夫
人之奏下廷議而命良襲封焉良謝恩于廷歸拜家慶
夫人以良見家廟退坐內寢勞良而語之曰昔吾與汝
嫡母抱汝就獄置對時汝方患痘疹幾瀕死幸不死自
汝父及汝嫡母相繼即世後吾專理內政絕葷茹素日
訓敕汝曹子若孫今四十餘年惟以汝太宗未復為念
今汝能如此吾雖死亦可以此以見汝父汝母矣喜極
復繼之以泣子良輩皆拜泣不能興其後良以誥命請

朝廷遂贈曳夫人為武定侯夫人而封夫人為太夫人夫人復以茲意反復為良言之論者以為夫人在婦女中有烈士之行其於郭氏也有興衰起廢之功天將念營國威襄公元勲不可忘也耶不然孰能使夫人秉德貞堅相其後嗣八旬康健貽法子孫而終能安靖厥家垂慶來裔也耶余請即事以為銘焉銘曰

烈烈夫人德音不已既相所天復成厥子厥子伊何為寶竹君始雖藏晦終乃大申施于孫曾載多受祉允矣

公侯必復其始夫人之德其孰凝之維爾雲仍百世祀之

封太安人李氏合葬墓誌銘

安人諱某錦衣百戶李侯璟之長女成化乙巳歸為京衛武學生葉君蘭之配蘭字文賢錦衣衛都指揮僉事文盛之介弟也兩家既久有交游之義而安人又早有宜家之德凡所以事舅姑相夫子和妯娌逮羣下者咸有其道於是舅姑稱重之以為使吾兒今日得以積勤

問學無內顧憂而他日得以發身成名者將於是婦焉
有賴矣詎意文賢竟於弘治庚申齋志而沒年纔三十
有四耳是時安人欲捐其生以相從以舅姑父母力慰
喻之而止然嗣是猶終身傷慕不替教其子鳳翔鳳岐
以勤儉為常訓遂克底于成立鳳翔今為錦衣百戶得
贈文賢如其官安人亦榮受恩典蓋受封者凡幾年而
始卒今正德己卯六月十日也享年止五十有二亦平
日哀傷成疾而致然云鳳翔等將以是年七月己酉扶

安人柩於都城門外祖塋七里鋪之原開文賢壙而合
葬焉乃匍匐偕其從兄叅將鳳儀奉僉都御史甯君仲
升之狀來請銘銘曰

初卜筮兮告吉祥合琴瑟兮偕鳳凰中胡為兮割肝腸
二十二載兮稱未亡命雖薄兮義則長于夫與子兮咸
有光生同室兮死同藏昔志願兮今乃償嗟盛事兮寧
可忘庶奕葉兮傳餘芳

大明高都督妻夫人蘇氏墓誌銘

高夫人蘇氏涿州義官英之淑女為今榮祿大夫後軍
都督府右都督朴齋高公得林之元配生天順庚辰春
正月八日卒於正德丁丑夏五月四日朴齋悼亡不已
思所以永其傳者乃令厥弟錦衣叔慶以刑部侍郎張
公綸所為行狀來請銘謹為叙而銘之初夫人之于歸
也朴齋尚未貴顯然門族高家政素繁惟夫人能以
勤儉相之於是舅姑安其志養宗戚式其禮節僮僕感
其慈惠隣里上下稱其義讓舅克齋翁每喜為人言曰

吾兒有良相矣吾後庶其遠大乎後朴齋累有軍功自錦衣百戶歷都指揮使以至今官夫人亦累受封誥自宜人以至一品夫人每歲時令節夫人嘗如例乘輜軒服入大內朝賀三宮屢荷寶鈔帑幣之賜其恩榮福履一時殆罕倫比然夫人之所以事上率下省費節財恤窮樂施者比之前時不異也不賢而能之乎以故士大夫之與朴齋善者嘗以為朴齋之所以累立戰功官躋極品恩遇隆重是固若祖考垂裕之休至論其門庭雍

睦人無間言內政孔修職業修舉則夫人之助固不可
誣也夫人生二子長早卒次傑以恩廕授錦衣千戶近
亦卒娶徐氏婦有共姜之節夫人傷子早卒不釋于懷
遂成疾以致大故亦其命也訃聞上遣官賜祭葬以是
歲六月某日葬於阜城門外玉河鄉闕向之原從先墓
也銘曰

吁嗟夫人德宜有子子既云亡壽亦止此吁嗟夫人勿
怨勿恫後來諸子必亢乃宗吁嗟夫人不亡者在生有

餘榮後有遺愛吁嗟夫人歸藏于茲尚永厥傳太史之詞

封承德郎吏部考功司主事馮公暨配李安人

合葬墓誌銘

蠡縣馮氏其始未詳所自徙元時有西臺御史曰守道者從其父始家于蠡即公之二世祖也公諱經字淑文曾祖彥舉富平縣主簿祖吉以季父南京工部尚書貫貴贈至大理寺卿父懽以入粟補義官母劉氏君生于

正統辛酉五月二十二日由監生除松江上海縣丞丁
外艱復除蘇州嘉定縣丞既而乞致仕以嗣子司勳郎
中蘭初任恩封承德郎吏部考功清吏司主事而沒焉
弘治壬戌四月五日也配李氏繼張氏俱先公卒已封
贈為安人子一即蘭也由進士除考功主事遷司封員
外郎歷今官女二長適長沙吳汝梅次適舉人劉潮張
安人女一適庠生劉汝霖蘭之子長曰修次未名女一
適儒士王復古始李安人之沒實先公二十有一年葬

于縣之大百尺鎮北之原蘭常以儀文未稱為慊茲卜
以八月二十一日啓其壙奉公柩而合葬焉凡分所得
為而力能為者蘭固將殫厥心莫之有悔焉耳矣銘曰
我昔與公過從再四既偉公容亦遠公器古稱長者公
殆近之孝友之實驗于色詞疏戚卑尊咸知敬愛僮僕
訢訢趨事無怠始焉作宦不卑小官兩丞劇縣志在元
元晚念慈闈就封歸養護草尚榮公胡告喪公先哭弟
哀痛實多今日伯兄抱恨如何公之閨門實維雍睦賢

配既徂恩義猶篤比于繼室不替徽音鄉閭之美傳及
士林六十二年未云中壽天之報公益昌厥後維公祖
考贈過其封公有令子後將無同公昔之官期余再見
公今亡矣敢藏公善先室之穴公此同歸嗣有贈儀尚
無窮期

明故資善大夫禮部尚書致仕贈太子少保石

城李公墓誌銘

昔成化戊戌常熟李石城先生始自翰林院編修遷侍

講又九年丁酉遷侍讀學士後孝宗登極以先生有青宮講讀舊勞稍遷左春坊左庶子學士如故既而憲廟實錄成與先生同職纂修者遷少詹事或太常少卿仍兼學士惟先生遷南京國子祭酒以去雖燕賚加祿之禮不缺焉然出入遠近之間禮意不侔矣說者謂當道厭人好直故用意沮尼於其中宜其然乎既而先生連遭內外艱俱特賜葬祭洎服闋起為太常少卿兼侍讀學士遂遷南京禮部右侍郎轉左侍郎拜南京吏部尚

書復召為禮部尚書時中官劉瑾亂政受某府親藩重
賂欲以鎮國將軍為郡王怒先生執成法議之將中以
危法賴上心垂察止令致其事以歸劉瑾既誅詔吏部
疏起舊臣有才識為瑾所擯斥者先生雖名在首列然
雅意林泉無復有仕進意矣嗚呼當道者能尼人於祭
酒之時而不能尼人於宗伯之日劉瑾能怒人於議禮
之際而不能怒人於疏起之時况先生幼學壯行克全
晚節名遂身退貽福無疆是固平生好直之報天定固

能勝人也豈瑾輩所干與哉先生諱傑字世賢以世居常熟石城里別號石城雪樵生正統癸亥卒正德丁丑家譜遭元季喪失無所考今以曾大父居仁府君為始祖云既貴獲贈大父濟父希潤俱禮部左侍郎祖妣徐氏郭氏妣徐氏元配章氏俱淑人側室曹氏生長子曰而達應例授七品散官繼配戈氏生次子曰而進授光祿寺署丞曰而遇授中書舍人皆先生廢也女五人錢奎趙原錫劉夢錫顧榮華翰其壻也孫男四元紹元貴

元顯元望初先生為編修侍講時嘗充經筵及青宮講
讀官三為會試同考官兩同兵部侍郎及都察院副僉
都御史為清理武職貼黃為學士時嘗主考順天府鄉
試及為殿試讀卷官又為纂修實錄兼校正官為少卿
學士時經筵講讀以舊臣仍首為青宮講讀又為纂修
大明會典副總裁官後闕里孔廟災命奉香帛往祭告
為禮部侍郎時因夏旱命祭禱天壽山而雨又為泰陵
山陵使既沒蒙賜諭祭二壇有司為造墳安葬凡此皆

關係朝政大體故並書之公自幼穎悟至老猶手不釋卷在仕路四十年歸田又十餘年有文集若干卷藏于家今其子某等皆淳雅有文行足以增光而裕後先生之澤固未艾也銘曰

惟公尚直匪徐與亟雖為當路所抑晚而際遇出入皆榮宗伯歸來道若可行虎豹九關莫達鴻飛竟爾冥冥予之斯言亦豈足以槩公之平生也耶

明故南雄府同知致仕進階奉議大夫介菴鄭

公墓誌銘

昔成化甲午冬予與郡人吳美中璉李元善祥同會試
京師至弋陽又邂逅莆田鄭元美徽鄱陽胡大聲韶相
與偕行其後雖仕路出入不齊然始終交誼不替今四
十有餘載矣見存而仕者則惟胡大聲為八閩方伯予
亦尚竊祿於此元美則以府同知美中以縣尹數年前
以自請致仕而元美近亦亡矣厥子嚴州通判相既專
人走書告訃復以鄉人林大夫見素先生之狀請墓銘

曰此執事之舊約亦先生之遺囑也遂哭而為之書序
曰惟鄭氏為莆田舊族始祖淑唐州別駕以文義鳴于
鄉高祖玉曾祖福祖璿自國初以來皆隱德弗耀父諱
立始仕至饒州府學教授以元美考績恩贈大名府通
判并贈母林氏妻張氏俱安人元美性仁厚周慎居家
以孝友稱與人交情禮備至於慎終追遠敬老慈幼念
舊恤貧之義尤惓惓加之意初釋褐為南昌府通判職
專管糧民俗既熹訟而豪右糧入多後期前倅每坐此

去官雖元美毅然清白臨之後尚為所搆竟調判高州府既丁憂服闋復改判大名府專管馬政三府人士至今以潔已愛民稱之用巡撫巡按薦陞南雄府同知後久不之任臬司遽以員缺報吏部據其言遂以王中補之洎元美到一月王中亦繼至藩司兩以上請吏部檄下元美當起送改用既而有新例凡先常調官俱致仕元美亦在例中有勸其更自理者元美不理竟歸莆既歸家無厚積泊然自守非公事不到府縣門其後權姦

死新例格不行吏部復有文移起用元美而元美竟亦不起遂以原職進階奉議大夫致其事于時邵守張君琦曾有詩美之云吾欲相依時考德瘦藤稀見郡齋行去歲元美生辰予亦寄詩為壽云歸田曾未買良田誰似淩江貳守賢皆非過許也嗚呼當王中始至南雄時元美視事已月餘及王中死人謂元美必當補之然監于上者或有求賂意而元美不肯從往來士大夫每喜人善將迎而元美不肯為之屈以故事多齟齬竟使浩

然有歸志曾不獲少安于位以遂平生之志是豈非命也哉相前來自嚴州予嘗與之言及相謝曰老父今家居亦自無怨尤意惟以亡弟彬未仕而卒為痛耳然相今有子二人曰一彥一竒孫一人曰嚴彬亦有子一人曰一鳳異日稍承庭訓居官涖政有一可取則老父之志願畢矣予聞相言重為元美慰於地下也因并書於此以志予哀云元美生正統辛酉八月初二日卒正德甲戌十月初十日相將以丙子十二月二十六日葬于

鳳凰山乙向之原其地蓋元美所自擇云銘曰

吁嗟元美家學有源百年隱德昔閔今宣惟教授公仁
厚正直元美繼之一心翼翼謂宜大振以究厥施誰令
中阮竟止於斯十載歸莆曾靡怨懟視力行仁鄉有遺
愛有子有孫以續其傳唐賢之盾永勿替焉鳳凰山前
生芻未束既誌此詞復繼以哭

院孺人黎氏墓誌銘

封大理寺右評事代州院君某之配孺人黎氏陝西按

察僉事賓之母也早從封君于役京師用勤勵謹約處其身以裕其家肆子姓服其慈訓鄰里慕其禮則朝廷封敕褒其敬慎蓋所以為婦為母者具有道矣弘治

闕

賓考其評事之績孺人與封君始同拜敕命踰二年庚申

孺人隨僉憲之官陝西辛酉四月五日卒于陝之莊浪

享年六十有二歲

闕

月

闕

日返葬于京師轎亭原之左

賓以其友田中書佑所狀行實求予銘予與賓有塲屋

過從之舊誼不能却也銘曰

人之生子恒欲其多多而不淑其懼如何猗嗟孺人一
子惟肖女數如子壻官亦耀嘗聞封君舊買南珠後售
于賈利什子初孺人贊言此原某物請召伊人各分其
一僉憲命下母病未痊子欲遲遲永倚膝前母曰不可
王事靡盬我其同行汝行毋阻至于莊浪病復乘之猶
舉古訓為子勉之人亦有言利能昏智死生之際夫豈
小事孺人於此所見何明今聞其語尚有餘清轎亭之
原勢來形止歸櫬攸藏過者式只

亡室贈一品夫人馮氏墓誌銘

夫人諱德坤姓馮氏故福建叅政南海馮公遵之次女
母陳繼母李皆宜人成化甲午公為吏部司封郎中嘗
報書我先君許締親焉明年予會試不第始親迎南歸
時予在具慶兄及弟怡怡如也家用雖不豐然夫人能
同甘苦無戚戚意處諸妯娌亦無間言後以予貴封孺
人再封宜人弘治己未予有使交之行夫人隨至吉安
遇疾以卒五月闕有闕日也距所生景泰丙子四月闕

日得年四十有四子六人時存者三次攄由軍功今任
廣東都司都指揮僉事次揆授中書舍人次揭國子生
後沒亦授其子宸中書舍人女一適廣西右布政使陳
公穢之子勲今亡矣夫人沒予續娶歐氏高氏為繼室
各有子次挹歐氏出京學生次攄高出亦中書舍人孫
六人長即宸次數敝攷徹教嗚呼予幸承祖宗餘慶得
至顯官使夫人而未卒則三品以上之誥命皆當次第
受之矣今止能令次攄輩焚黃告祠墓而已況自始卒

至於今已多歷歲年顧今雖蒙恩遣官治祭葬榮被存
沒然孰若昔年早葬之為禮哉蓋由于竊祿于朝夕不
能歸而時師風水之說又有以疑誤諸兒輩以致於是
悔無及矣尚何言銘曰

辛巳之臘其日甲申有來天使葬我夫人其地伊何石
梗南村勢來形止風氣頗全凡附於棺庶其無悔尚俟
他年我同歸於此乎

大明閔司寇夫人王氏墓誌銘

夫人諱玉浙之歸安義官王伯璋女幼有淑質伯璋奇愛之語其配錢曰吾是女必不以儷凡子後得今太子太保刑部尚書閔公而許聘焉公時為郡庠生志必欲領鄉薦而後有室及領鄉薦親迎則與夫人俱年二十有四矣公後由進士為監察御史為按察副使累擢都御史侍郎以至今官夫人由孺人累封至一品夫人始終五十餘年凡公之所以致孝庭闈垂休後嗣親睦族黨禮遇僚家德望隆重歸然為朝野一時名臣者雖由

公平生勉強行道之力然亦豈非夫人之賢德實有以相於內而致然哉其尤可稱述者當公為御史巡按河南時夫人留處京邸其姻有至自浙中遺舊僕來餽香粳白金為歲節常禮者夫人固却之曰公瀕行時實有戒今不敢違也自公為侍郎以來夫人每歲時服命服入內禁朝賀清寧仁壽坤寧三宮薦被寶鈔綵段之賜其顯榮崇重至矣而夫人自處謙約與平昔不異且每有止足之戒洎公再疏陳情得致仕夫人尤喜動顏色

既還家益佐公為光前裕後之計如是甫半載而有疾
又二載而疾不可起矣正德戊辰九月甲午也夫人生
宣德庚戌閏十二月四日有子二人閤聞俱應詔輸粟
于邊授薊州衛指揮使女一適臧顏亦指揮使而閤先
夫人卒孫八宜勤南京前軍都督府都事宜劬宜勵俱
國子生宜勛早天宜勛宜劬曾孫男九餘慶重慶
嘉慶延慶福慶德慶積慶長慶大慶孫女四曾孫四其
盛如此自夫人卒後屬時有厲禁有司久不敢舉行舊

典近禮部為之請乃得旨命賜祭二壇有司如式治葬
事於是卜以壬申年十二月二十日庚申葬夫人於烏
程金蓋山之鳳凰原亦歐陽子所謂蓋有待焉者也銘
曰

金蓋之原茗水之陽有鬱其林是為閔夫人之藏噫夫
人之藏其尚與斯山高而斯水長也哉

祭文

祭李西涯文

正德十一年八月庚戌朔越九日戊午後學南海梁儲
謹以少牢庶品清酌之奠致祭于特進光祿大夫少師
兼太子太師華蓋殿大學士西涯李公之靈嗚呼儲晚
進末學無所肖似其始也辱公知顧竟引置于內閣論
思之列其中也公乃以直道勇退使儲也不得有所則
倣以為依歸其終也公又忽然長逝使天下蒼生無復
有東山之望然則儲之憂慟夫豈直一己之情而已哉
不盡之詞尚當嗣布於几筵之下茲但畧陳其一二公

獨不能鑒我之隱憂心曲也耶

祭倫迂岡親家文

維正德九年歲次甲戌六月壬辰朔越八日己亥少傅兼太子太傅吏部尚書謹身殿大學士同郡梁儲謹以少宰庶品清酌之奠祭于親家故奉直大夫右春坊右諭德兼翰林院侍講倫君伯疇之靈而言曰甲科之榮會元殿元況在嶺海士孰克兼君克兼之大福可占眷此良材早優文學平步詞林德音濯濯宮僚既陟遠到

有期後來公輔舍此奚之駟馬初馳六轡如組稅駕中
途於何控告去年將命試士南畿歸而病作遂至於斯
天乎命乎誰其尸責老我衰顏可任悲愕靈輅將發薄
奠告心他日生芻俟更矢音嗚呼哀哉

祭陳侍郎文

維弘治十四年歲次辛酉七月丁未朔越二十日戊辰
翰林院學士梁儲謹以清酌庶羞之奠祭于故亞卿仲
濂年兄先生之靈昔我同年名餘三百入滿鵬班出聯

紫陌難齊者命易失者時悠悠二紀幾切懽悲或異升
沈或隔生死沈者未量死則已矣如何今者復哭我公
感今懷昔為恨何窮公之秉心實維良淑車攻御能遠
到可卜近登卿佐清譽藹然今春會面樂意難宣別冀
好音忽聞凶訃茲對靈輅可任攀慕惟公瞑目實有佳
兒維公不朽復有銘詩公年未六十斯二者固亦可以
無窮期矣是尚不足以塞儲之深悲也耶英靈如在庶
幾鑒此嗚呼哀哉

祭昌國張公文

猗彼梗楠其生有自枝條既茂亦庇本根維公之先德
垂後嗣肆生淑似以儷至尊如古邑姜功毗內治匪公
積善曷啓慶源慶源既長帝念不已高官大爵洊沐推
恩恩出不貲人無異議知公於國益有功存謂享期願
以觀至治胡祝在路胡弔在門壽雖不遐哀榮終始皇
恩百世界爾子孫公死有知復何憾止祇應戀國尚有
忠魂儲等職忝近臣於公存歿義存戚忻一觴致酌侑

以藻蘋神之聽之鑒此蘭薰

祭許世昌文

維嘉靖三年歲次甲申三月丙寅朔越四日己巳南海
石溪病叟梁儲謹遣小孫晨以清酌庶羞之奠詣故人
許世昌先生靈之次而致辭曰前年臘日君至羊城自
春徂夏疾病相仍茫茫瓊海觸熱南征途經高要遂殞
厥生嗚呼痛矣人尚忍聆之哉君生世胄久擅才名功
高謗至位顯身傾死生命耳柰此孤嫜迢迢萬里日泣

銘旌魂其歸國冀祔先塋知君賢子必敬以誠庶幾來世
後祿可憑君其勿憾鑒我哀情嗚呼痛矣人尚忍聆之
哉

祭遠齋文

維弘治三年歲在庚戌四月癸未朔越八日庚寅弟儲
等謹以羊豕清酌庶羞之奠告祭于伯氏叔遠先生之
靈嗚呼吾兄弟六人當成化丙午歲叔孚既先吾二親
而卒今三月辛巳兄又繼二親與先叔而亡吾祖宗積

數百年吾先人又嘗救二千餘人之命何吾兄之長材
遠器而竟駕厄于中路壽止於四十有八不及見男婚
女嫁時也謂之何哉儲等今尚當相與扶植次掄輩使
之有樹立於世庶幾以慰吾兄不昧之魂焉耳吾兄其
幸聽此言否於乎哀哉於乎痛哉

祭黎翠峰封君文

忝戚少師兼太子太師吏部尚書華蓋殿大學士梁儲
謹以少牢庶品之奠致祭于敕封文林郎陝西道監察

御史翠峰黎先生之靈曰跡公平生養高田里聞達不求而富書史鄉稱善人曾無怨訾卒不顯隆以昌孫子恩典初隆宜綿壽祉胡遽山頽七十而止今拜新墳情何能已嗚呼哀哉

又代兒次揆作

嘉靖三年九月丙子吾親家黎一卿侍御將奉其先君封陝西道監察御史翠峰公之柩自羊城返葬於從化韶山之原眷生中書舍人梁次揆謹以少牢之奠先二

日甲戌敬詣樞前三獻酒而致詞曰惟公先世奕葉清
風惟公德宇冬嶺孤松嗣箕裘而肯構垂善慶以無窮
黃髮無疆藹爾著家邦之譽白眉既貴居然受柱史之
封于以副鄉里衣冠之願望于以啓郎君異日之勲庸
一時盛事孰與比隆次揆猥以薦蘿獲施松柏昔每拜
嘉今何報德翩翩靈旆悵百里以將歸鬱鬱佳城痛九
原之可作我酒非馨我殽亦薄神其聽之鑒此誠恪鳴
呼哀哉

祭遲菴府君文

正德十六年歲次辛巳八月庚辰朔越十九日己亥孝男儲敢昭告于顯考誥贈特進光祿大夫左柱國少師兼太子太師吏部尚書華蓋殿大學士遲菴府君曰儲越從曩歲銜命使交獲拜先塋不遑久駐日月逾邁載越廿年萬里家鄉長懸夢寐幸逢明聖得請歸休汎掃寒蕪可勝永慕謹以少牢庶品之奠用伸虔告尚享

祭吳美中主事文

維嘉靖三年歲次甲申三月壬辰朔越二十七日丙申
少師兼太子太師吏部尚書華蓋殿大學士致仕梁儲
謹以清酌庶羞之奠致祭於明故江西進賢知縣封戶
部福建司署員外郎事主事加四品服吳君美中先生
之靈曰昔在郡庠氣求聲應君易我詩更相是正同膺
鄉薦同赴春闈自是厥後始恨多違君後登科出宰百
里撫字心勞其直如矢人誰辨玉抱璞何施浩然歸志
騷騷難追適意林泉餘三十載天道有知鳳雛藹藹載

承封誥重進官階名完福備茲世孰儕今幸獲歸頻瞻
德宇謂始自今勤陪笑語有懷莫遂有恨難伸詞以告
情君聞不聞嗚呼哀哉

鬱洲遺稿卷七

欽定四庫全書

鬱洲遺稿卷八

明 梁儲 撰

詩

金門待漏院試作

十年丹宸夢中情幾向長安對月明
鳳闕未曾開曙色龍池先已聽鐘聲
焉知落落孤踪士獨抱區區萬里誠
却恨相如獻詞賦不將憔悴及蒼生

元夜

四方民瘼已無憂
聖主宵衣正御樓
萬歲山前黃道轉
九層臺上紫烟浮
星環鳳宸高居處
雷動鰲山最上頭
此夕歡娛知幾許
霓裳誰羨月中遊

已遣金吾弛夜巡
更將休沐賜羣臣
一年月向今宵好
萬國春從此後新
王豫庇民徵夏諺
薰風調律叶韶鈞
踈虞久濫瀛洲客
竊祿年年未致身

尊前休問夜如何
且聽佳人達曙歌
圓月向人偏皎潔

緒風吹面正清和星從左个將春至雁向南樓帶字過
翹首五雲最深處千觴應助聖顏酡

萬年枝上雪初晴千步回廊月轉明天為良辰留美景
風傳和氣作歌聲廣寒自昔身難到弱水今宵浪已平
願向大庭歌此曲卷阿詩句合先賡

壽劉閣老夫人

何處飛來海鶴姿白頭金紫照清時天教椿樹長如此
身是神仙自不知膝下綵衣丞相舞花邊春酒上公持

年年入奏昇平曲不道禎祥正在茲

送李守正吉士引疾還家

西風吹雨濕窓紗
堦下決明纔着花
人在玉堂看起來
病辭仙仗喜還家
舟移潞水天初遠
馬入聊城路不賒
預約明年當此日
板輿隨母覲東華

壽崔太常次邃菴韻

聖明親簡太卿賢
重疊恩光照暮年
惟學后夔能典樂
不隨方朔更求仙
瑤琴待月成三友
珠唾隨風落九天

明日藥欄招手地也知吾得預賓筵

送倪尚書

東曹居第冷如冰共喜公來聚德星
諸老入門時秉燭晚生投謁亦分庭
高才司馬休歸洛白首侯芭願執經
慚愧淺才同甌石臨岐猶擬挹滄溟

和張元昇宗伯遊西湖見寄

春風飛鞚帝城西楊柳陰陰夾御堤
寺外斷雲千里目壁間流水十年題
禪談有味風生席詩思無邊月在溪

老衲不須留玉帶百篇端已重招提

挽周司寇

未老辭官帝未俞七旬方得賦閒居却憐陽曲無歸宅
翻使臺城有卧廬三尺龜趺莊懿墓萬年金匱史臣書
槐庭雨露今如許猶是當時積慶餘

壽座主彭閣老

乞歸先伴赤松遊甲子今來又一週髮白已憐身早退
心閒還與國同憂書成東里終篇後名冠西江第一流

薑桂自憐偏性在當時藥籠愧同收

壽丘閣老七十二

瓊山前度降神時初報寒梅第一枝麟出九真曾瑞世
鳳翔千仞更來儀蒼生正喜歸仁壽黃閣于今有俊耆
淺薄幸隨鄉里後願輸忠悃荅無為

送叔永如金陵

車輪此去願遲遲莫惜頻頻有和詩前度歲華方共惜
後來風雨莫愆期誰令別酒初醒地正值飛鴻獨下時

今夜秣陵春草色想應先滿謝家池

中元謁陵次屠東湖韻

松栝蒼蒼望不迷五陵風露已淒淒
立當明月頻驚雁行過荒村只聽雞
原廟尚聞藏劍履關門何用借封泥
不堪馬上成歸夢還繞東華綵仗齊

頃以事至留都舊寅諸老用詞林故事燕于吏

部後堂歸成二首

故人交誼重南金畫省風流許重尋
千里雲霄遠比翼

十年江漢阻知音
祥鸞自合歸阿閣
倦鳥惟思返故林
多謝北堂今夜月
後來應照我遐心

停觴休訝飲遲遲
蠟炬分行照翠眉
頭白尚憐公記憶
力微虛負主恩私
鵷鸞天上終相遠
魚鳥江邊定不疑
他日鳳凰樓畔客
相逢還更語相思

蕭總制致仕西歸予亦自嶺外至相會話別

河橋柳色正絲絲
故國逢君又別離
江海論交惟此日
山林歸隱又同時
公如白璧心何忝
我戀青山力已疲

從此側身西望地年年空憶采華芝

次三老閣前迎春草

二月羣芳尚未花獨憐仙草已抽芽
風傳紫禁香初遠月到瑤堦影未斜
泉石故知慚小草江湖何處寄瑤華
祇應待到重陽日猶有餘香共菊誇

此草二月至九月猶花

送陳亞卿冊封

吟罷霞天菊未花驅車明日是天涯
留人初攬淮南桂奉使還乘漢水槎
八座官聯班最貴維城宗子頌非誇

歸來獻賦明光殿依舊彤雲繞翠華

送傅北潭宗伯致仕

水蒼為佩錦為袪長照天家白玉除北闕早年仍聽履
東門今日已懸車尊前綠綺風吹斷望裏丹梯畫不如
此去若逢關令尹好將道德著成書

和楊邃菴郊壇齋居之作楊民部舊僚也

寶炬光中夜漏深萬行珠樹肅蕭森陽回左个迎雕輦
人在東壇整玉簪伐木尚憐求友義傾葵偏切侍臣心

金史卷八
卷八
懸知扈從歸來日應有文思頌德音

壽三原王太宰

翹首班行八座尊清風歸去隱三原為霖望切人心在
調鼎功多國史存心遠尚憐思魏闕身閒聊得卧丘園
庭前藂桂高千丈應是明時雨露繁

代夏景述懷

小麥青青大麥柔榴花開遍殿東頭日長麋鹿惟依輦
波靜魚龍不負舟家國有賢天所鑒生靈無事我何求

堪嗟漢武神仙意誤却當年尚未休

次西涯韻

十年身已到璇霄開閣猶聞引下僚
玄圃會須呈璞玉終南當復賦梅條
人才孰可追三代文字君應歎六朝
試問澄江靜如練何如澎湃浙江潮

和蔡東軒駙馬自壽

一代豪華稱戚畹百齡風骨似神仙
舊聞朱印隣珍館新賜黃封出御筵
塵榻每緣佳客下清風還許後生傳

欲知簫史酬恩地惟以忠貞照暮年

使節榮歸為江文源侍讀作

為因銜命到蘄陽還得承歡向北堂金冊手持歸赤社
綠衣身著到錢塘鵷鷺一別思仙侶書劍何時返帝鄉
聞道江南民瘼甚願裁封事上明光

李程二學士被命教庶吉士唐大夫有作奉柬

予次其韻

奎壁光芒夜徹天兩公新命領羣仙金堤曉日聯絲鞚

玉署春風醉錦筵
鸞掖文章瞻具美
鯉庭詩禮屬多賢
中丞賸有新篇紀
明日都城作話傳

東園次陳以道評事

老來心事樂幽栖
看竹憐君遠見攜
初輟班行來入社
舊栽花木已成蹊
東籬誰送陶潛酒
半夜還分太乙藜
從此過逢知不倦
帝鄉今已隔雲泥

壽鄭介菴為其子通判作

歸來猶未買良田
誰似淩江二守賢
心已忘機猶愛國

身無侈累却求仙聽殘曙鳥眠初覺吟對秋英句倍妍
明發阿郎歸省地豈無庭鶴共蹁跹

送唐給事出使侍母還鄉

朝回長得奉慈闈又却乘輅侍遠歸江水自饒魚入饌
門閭偏稱錦為衣君親恩重知難報江海情深念久違
驅遍羊腸無畏處也應持此報春暉

送曾大尹

宿雲收盡好風來令尹帆檣此日開人為循良添悵望

詩因離別句難裁
楓宸玉帛千官會
花縣琴書幾日回
家近河陽春尚淺
滿城桃李更須栽

遊海珠寺

是誰驅石到江心
天為羊城鎮古今
風月不隨人共老
鶯花寧藉我登臨
詩情肯與珠爭麗
酒興還憐海共深
恠得蘭橈歸去晚
佇看靈雨遍山林

江上作

江月霧中明
孤舟觸浪行
吹笳知遠浦
沽酒聽寒更
旅

雁依依去霜風落落鳴故園松與菊今夕倍關情

送冬官王申之

郎署念庭闈秋來病乞歸鳥鳥心正切江海念無違衣帶前時減燈花昨夜輝高堂十月景猶待老萊衣

北堂雨露詩為侍御曹汝學作

天上恩波遠人間慶澤長慈闈初拜命先子重增光賀客朝朝滿綸音字字香欲知圖報地葵藿正傾陽

端午賜扇

寶月輝周製銀鈎燦禹謨九重新澤出萬壽小臣呼天
上清風好人間暑氣無願言均此施蕩滌到樵蘇

敬軒何君頃以公事至京師事訖言歸索詩為
別因為之賦此

王事有程期居京越一時不愁春易盡惟恨路多岐白
酒先秋熟黃柑帶雨垂故園歸興好莫惜寄來詩

孝貞皇太后王氏輓章

南有烏衣巷生祥舊不休文王初御極太姒已歸周明

發詩篇在闕雖德澤流孰知從此去長夜竟悠悠

二十三年內恭勤奉至尊心猶憂治世恩不厚私門中

饋思民瘼端居念化原黃童兼白叟歌頌至今存

四海雍熙極重闡孝養深宮中無遂事天下有徽音壽

祝千千歲恩沾萬萬尋那知遺詔下哀動聖皇心

聖德那能紀風謠豈易聽悲笳纔一動羣淚已千零舊

事留編簡餘音入杳冥祗應松柏路還有五雲扃

次簡正郎韻

幾歲乞歸休，銜恩尚勉留。形容空自老，松菊為誰秋。病
豈堪朱紱，天應念白頭。秋鴻莫先去，期傍我行舟。

次春日述懷韻

南國東風早，鶯花動客情。故鄉難夢到，羈客易愁生。白
髮行俱變，丹心祇自明。不知從此去，何處憶韓荆。

元夜應制

雲中珠翠壓鰲頭，雉尾雙雙護冕旒。聖主經年少巡幸，
春來方覩屬車遊。

絲管紛紛醉上元
萬家燈火映乾坤
內庭別有光明燭
留與人間照覆盆

一曲陽春四海同
君王猶自祝年豐
不緣烟月娛清夜
為采歌謠獻兩宮

無題

千門萬戶總光風
別有昭陽一樣紅
誰道翠華遊幸遠
又移春色醉重瞳

月雁圖送韓廷宣兄南歸

蘆葦蕭蕭月明裏飛鴻正值秋風起
今宵暫喜棲息同
明日茫茫隔烟水

春草圖

漠漠春風綠遶池王孫何日是歸期
緇塵一隔江南路
滿眼青青亦自疑

送鄉人

西風吹雁客還鄉黃菊初開別思長
南望石橋霜後橘
不知何日對君嘗

老子

主善為師道正隆宣尼此意正無窮如何後代相師者
不及巫醫與百工

恭題宣宗御筆扇面上有宣德六年字

淇園湘水萬千枝不似君王筆下奇高者拂雲低拂地
想應重有鳳來儀

題畫

登山臨水送將歸去住心情只自知明日紅塵車馬地

可能無念出山時

題畫魚

水蘋多處着遊魚不應人間罟網須莫道市朝無吏隱
試看堂壁有江湖

題畫花

向來曾作看花人長恨花無十日春何似入君花譜內
經年紅豔不沾塵

挽黃門林克肅其子任中書舍人

黃門舊日讀書齋
堦下孤桐手自栽
今日孫枝長百尺
幾時仙馭復歸來

四皓

已為留侯定漢儲
舊山松桂未蕭疎
如何復向他山去
應恐重勞使者車

四賢心行可誰如
垂老猶堪定漢儲
從此班行絕踪跡
史臣何事不重書

徐孺子

不入東都黨錮羣自於南畝卧閒雲可憐一束生芻莫
不負交情只有君

呂洞賓

煉得丹成欲度人江湖來往意殷勤如何世上求仙者
不似枯楊解識真

御筆畫禽鳥

誰抱遺弓望翠華臨池曾憶捲雲霞碧桃枝上雙雙鳥
立盡東風幾度花

俛啄依依在野田
奇毛偏得聖恩憐
龍媒一去無消息
猶戀雕籠記昔年

鬼谷子


紛紛兵法漫相傳
鬼谷書成抵數篇
不見濟民兼利物
只聞孫氏蹙龐涓

黃石公

一自橋邊半夜逢
幾從天上翊飛龍
當時一策無人用
歲晚歸來訪赤松

紅梅為東宮伴讀段君賦

羅浮仙子玉為容移入宮牆便不同應為歲寒心事好
天將朱紫答元功



鬱洲遺稿卷八